



A.N.P.A.
Cernades

Asociacion de Nais e Pais de Alumnos Cernades
C.E.I.P. Carballal
Camiño Freiria nº1 Cabral - 36318 Vigo.

ESTATUTOS ASOCIACION DE NAIS E PAIS DE ALUMNOS

CERNADES

C.E.I.P. PLURILINGÜE CARBALLAL-CABRAL

C.I.F. G 36.732.444



ESTATUTOS

CAPÍTULO I **DA ASOCIACIÓN EN XERAL**

Artigo 1. Coa denominación de Asociación de Nais e Pais de Alumnos “ **Cernades** ” do Colexio de Educación Infantil e Primaria Plurilingüe Carballal-Cabral, constitúese unha entidade ó abeiro da Lei Orgánica 1/2002, do 22 de Marzo, e normas complementarias, con capacidade para obrar, carecendo de ánimo de lucro.

Artigo 2. Esta asociación constitúese por tempo indefinido.

Artigo 3. A existencia desta asociación ten como fins:

- a) Velar polos dereitos do alumnado do colexio, no que se refire a súa educación, de acordo co artigo 27 da Constitución.
- b) Defender os dereitos dos pais, nais ou titoras e titores legais sobre aquilo que afecte ó proceso educativo e formativo das súas crianzas ou alumnado titorizado.
- c) Participar na elección dos representantes dos pais e nais ou titoras e titores legais nos Órganos Colexiados do Centro, Municipio, Provincia ou calquera outro Organismo de ámbito territorial máis amplo, promovendo candidaturas, velando pola pureza do proceso electoral e colaborando na correcta realización das eleccións.
- d) Colaborar na labor educativa do colexio e de xeito especial nas actividades complementarias e extraescolares, promovendo e desenvolvendo actividades formativas, deportivas e culturais dentro e fóra do recinto escolar.
- e) Orientar e estimular ós pais e nais ou titoras e titores legais respecto ás obrigas que lles incumben na relación coa educación das súas crianzas ou alumnado titorizado.
- f) Colaborar na elaboración, desenvolvemento ou modificación das normas de organización e funcionamento (NOF) ou Estatutos do Colexio.
- g) Promover a participación da comunidade escolar no control e xestión do colexio en conformidade co disposto no artigo 27.7 da Constitución.
- h) Promover a colaboración con asociacións de outros centros do noso entorno, xa directamente en cuestións específicas con ANPAS de centros próximos ou ben por medio de Federacións.
- i) Defensa dun ensino de calidade, galego, centrado no país, que fomente a formación responsábel do alumnado nos valores democráticos e na non discriminación por razóns económicas, relixiosas, ideolóxicas, raza ou sexo.
- j) Requirir ós poderes públicos o cumprimento das leis, regulamentos e plans de actuación relativos á educación, reclamando a atención e axuda que esta merece.
- k) Desenvolver programas de educación familiar, para proporcionar ós pais, nais, titores e titoras, coñecementos e orientacións relacionadas coa súa función educadora.
- l) Contribuír e cooperar cos diversos servizos do colexio para o seu bo funcionamento.

- m) Promover reunións de colaboración de pais, nais, titoras e titores legais co profesorado e fomentar as boas relacións entre ambos estamentos.
- n) Promover a convivencia entre a comunidade escolar facilitando, organizando e desenvolvendo actividades lúdicas, educativas e culturais tanto dentro como fóra do recinto escolar.

Artigo 4. O domicilio social da asociación radicará na localidade de Vigo, Rúa Freiría, núm. 1, código postal 36318, provincia de Pontevedra. Poderanse utilizar outros locais asociativos adicionais na mesma ou noutras cidades, mediante acordo da Xunta Directiva.

Artigo 5. O ámbito territorial no cal, a tenor dos seus fins, vai realizar fundamentalmente as súas actividades é o Concello.

CAPÍTULO II **DAS PERSOAS ASOCIADAS**

Artigo 6. Poderán ser integrantes da asociación tódalas unidades familiares representadas por nai, pai ou persoa titora legal do alumnado, con plena capacidade de obrar ou tralo acordo do órgano competente da persoa xurídica, que reúnan os seguintes requisitos.

- a) Que teñan interese no desenvolvemento dos fins da asociación.
- b) Formalización escrita de integración.

Artigo 7. Dentro da asociación poderán coexistir as seguintes clases de persoas asociadas:

- a) Numerarias: as unidades familiares do alumnado matriculado no colexio e que serán representados nas persoas do pai, nai ou persoa titora legal do alumnado, sempre que o soliciten. Ambos os dous cónxuxes terán voz e voto.
- b) Colaboradoras: aquelas persoas que desexen ofertar a súa colaboración mediante a achega do traballo persoal e axuda económica. As persoas asociadas colaboradoras, terán igual dereito a voz, pero sen voto.
- c) Membros Socios e Socias de Honra: Persoas e entidades públicas e privadas nas que concorran circunstancias ou méritos extraordinarios, así recoñecidos pola Xunta Directiva da Asociación. Ó igual que as persoas asociadas colaboradoras, os membros socios e socias de honra non terán dereito a voto.

Artigo 8. Dereitos das persoas asociadas:

- a) Participar nas asembleas con voz e voto.
- b) Poder elixir e ser elixido ou elixida para os cargos directivos.
- c) Tomar parte en cantas actividades organice a asociación no cumprimento dos seus fins.
- d) Gozar todas as vantaxes e beneficios que poida proporcionar a asociación.
- e) Facerlles suxestións ós membros da Xunta Directiva cara a mellorar o cumprimento dos fins da asociación.
- f) Recibir información sobre os acordos adoptados polos órganos da asociación.
- g) Aqueloutros que sexan recollidas na lexislación vixente.

Artigo 9. As persoas asociadas terán as seguintes obrigas:

- a) Asistir ás asembleas xerais.
- b) Satisfacer as cotas que se establezan.
- c) Desempeñar os cargos para os que foron elixidos.
- d) Prestar cantos servizos determinen os estatutos, o Regulamento de réxime interno e os acordos das asembleas xerais.
- e) Observar unha boa conduta individual e cívica.
- f) Cumprir os acordos da asemblea xeral e o contido dos estatutos.
- g) Aqueloutras que se recollan na lexislación vixente.

Artigo 10. As persoas e entidades asociadas, membros de honra ou colaboradoras terán as mesmas obrigas que as persoas asociadas numerarias agás a posibilidade de intervir nos órganos de representación e de dirección da asociación e o pagamento da cota. Así mesmo, terán idénticos dereitos coa excepción de poder elixir ou ser elixidos para os cargos directivos e poderán asistir ás asembleas xerais con voz pero sen voto.

Artigo 11. A condición de persoa asociada pérdese:

- a) Por renuncia voluntaria comunicada por escrito á Xunta Directiva.
- b) Por falta de pagamento de cotas.
- c) Por realización de accións que prexudiquen gravemente os intereses da asociación.
- d) Por expediente disciplinario.

Artigo 12. A expulsión de persoas asociadas será acordada pola Xunta Directiva, trala audiencia da persoa interesada. En todo caso o acordo de expulsión deberá ser ratificado pola Asemblea Xeral extraordinaria e contra a súa resolución poderase recorrer perante a xurisdición ordinaria.

CAPÍTULO III **DOS ÓRGANOS DA ASOCIACIÓN**

Artigo 13. O goberno e representación da asociación están a cargo dos seguintes órganos:

- a) A Asemblea xeral, máximo órgano de goberno.
- b) A Xunta Directiva, órgano colexiado en quen a asemblea delega o goberno da asociación.

Artigo 14. A Asemblea xeral de persoas asociadas é o órgano de expresión da vontade da asociación e estará formada por tódolos seus integrantes. A presidencia e a Secretaria serán as mesmas que as da Xunta Directiva.

Artigo 15. A Asemblea xeral reunirse con carácter ordinario dúas veces ó ano, e con carácter extraordinario cantas veces acorde a Xunta Directiva, ou o soliciten o 10% das súas persoas asociadas. Neste último caso realizarase por medio de escrito dirixido á

Presidencia, autorizado coas sinaturas das persoas solicitantes, no que se expoña o motivo da convocatoria e a orde do día.

Artigo 16. A Asemblea xeral ordinaria reunirase necesariamente ó inicio de curso e ó fin do curso.

A Asemblea ordinaria será convocada con 15 días de antelación pola Presidencia da asociación, e deberá ser notificada por escrito ás persoas asociadas.

A Asemblea extraordinaria será convocada con polo menos 3 días de antelación tamén por escrito.

Na convocatoria figurará o lugar, data e hora da asemblea, así como a orde do día con expresión concreta dos temas para tratar e os anexos que procedan. Tamén se sinalará a hora da segunda convocatoria, sen que entre a primeira e a segunda convocatoria poda mediar un prazo inferior a media hora.

Artigo 17. Para que as asembleas poidan tomar acordos, estarán integradas polas persoas asociadas asistentes, sempre que concorran a metade máis un do total de persoas asociadas na primeira convocatoria ou con calquera número de persoas asociadas asistentes na segunda convocatoria.

Artigo 18. Os acordos tomaranse por maioría simple das persoas asociadas presentes ou representadas cando os votos afirmativos superen ós negativos, non serán computables os votos en branco nin as abstencións.

Será precisa a maioría cualificada das persoas presentes ou representadas, que resultará cando os votos afirmativos superen a metade destas, para:

- a) Ratificar a expulsión das e dos asociados por proposta da Xunta Directiva.
- b) Aprobar a federación con outras asociacións.
- c) Solicitar a declaración de utilidade pública.

Artigo 19. Son competencias da Asemblea xeral ordinaria:

- a) Aprobar o plan de actividades proposto pola Xunta Directiva.
- b) Examinar e aprobar a memoria de actividades.
- c) Examinar e aprobar as contas e balances do exercicio anterior.
- d) Aprobar o orzamento proposto pola Xunta Directiva.
- e) Aprobar o Regulamento de réxime interno da asociación.
- f) Fixar as cotas ordinarias e extraordinarias.
- g) As demais que resulten dos estatutos e que non estean expresamente conferidas á Asemblea xeral ou á Xunta Directiva.

Artigo 20. Son competencias da Asemblea xeral extraordinaria:

- a) Modificar os estatutos da asociación.
- b) Disolver a asociación e nomear os liquidadores.
- c) Aprobar a federación con outras asociacións.
- d) Ratificar a expulsión de persoas asociadas a proposta da Xunta Directiva.
- e) Solicitar a declaración de utilidade pública.
- f) Autorizar o alleamento, gravame ou hipoteca dos bens sociais.
- g) Elixir ás persoas asociadas integrantes da Xunta Directiva.

Artigo 21. Os acordos adoptados conforme cos preceptos anteriores obrigarán a todas as persoas asociadas, mesmo ós non asistentes.

As sesións comezarán coa lectura por parte da secretaría da acta da asemblea anterior que deberá ser aprobada. A continuación comunicará a orde do día. Cada punto será informado pola persoa da Xunta directiva que corresponda, procedéndose á súa aprobación nos termos contidos nestes estatutos, segundo a materia que se trate.

Unha vez rematados tódolos asuntos da orde do día abrírase, se así o considera oportuno a presidencia ou o soliciten un 10% dos asociados inscritos no libro de membros, a quenda de preguntas e suxestións. Concluído este punto, a presidencia dará por rematada a sesión.

Artigo 22. Poderase recorrer contra os acordos que vaian contra destes estatutos ou infrinxan os fins da asociación en reposición perante a Asemblea xeral. A partir da resolución deste recurso quedará expedita a vía para recorrer perante a xurisdición ordinaria.

Artigo 23. A Asociación será xestionada e representada por unha Xunta Directiva composta por: presidencia, vicepresidencia, secretaría, tesourería e, de ser o caso, vogalías.

Tódalas persoas que compoñen a Xunta Directiva deberán ser persoas asociadas (nais ou pais ou persoas titoras legais), maiores de idade, estar en pleno uso dos dereitos civís e non estar incurso nos motivos de incompatibilidade establecidos na lexislación vixente.

Todos os cargos que compoñen a Xunta Directiva serán gratuítos, sen prexuízo do dereito a ser reembolsados dos gastos debidamente xustificadas.

Os cargos deberán ser designados e revocados pola Asemblea xeral extraordinaria e o seu mandato terá unha duración de 2 anos e poderán ser reelixidos.

Artigo 24. Os cargos da Xunta Directiva cesarán na súa función polas seguintes causas:

- a) Por renuncia voluntaria comunicada por escrito á Xunta Directiva.
- b) Por expiración do mandato.
- c) Por incumprimento das obrigas que tiña encomendadas.

Nos casos a) e b) continuarán nos seus cargos ata o momento no que se produza a aceptación de quen os substitúa.

Artigo 25. A xunta Directiva reunirse con carácter ordinario unha vez ó mes e con carácter Extraordinario cantas veces o determine a Presidencia ou por petición de calquera dos seus membros.

As convocatorias realizaranse como mínimo con tres días de antelación mediante citación persoal na que se recollerá a orde do día.

Realizada a convocatoria, a xunta quedará constituída pola asistencia da metade mais un dos seus compoñente e para que os seus acordos sexan válidos deberán ser tomados por maioría de votos. No caso de empate, o voto da presidencia será de calidade.

Artigo 26. As facultades da Xunta Directiva estenderanse, con carácter xeral, a tódolos actos propios das finalidades da asociación, sempre que non requiran, segundo estes Estatutos, autorización expresa da Asemblea xeral. En particular son facultades da Xunta Directiva:

- a) Dirixir as actividades sociais e levar a xestión económica e administrativa da asociación, acordando realizar os oportunos contratos e actos.
- b) Executar os acordos da Asemblea xeral.
- c) Convocar as Asembleas xerais.

- d) Formular e someter a aprobación da Asemblea xeral o programa de actuación, así como a memoria de xestión correspondente.
- e) Formular e someter a aprobación da Asemblea xeral o orzamento do exercicio, así como os balances e as contas do exercicio pechado.
- f) Resolver sobre a admisión de novas persoas asociadas.
- g) Crear comisións de traballo co fin de delegar nelas a preparación de determinados actos e actividades ou recadar delas informacións necesarias. Ó cargo destas comisións designarase un membro da Xunta Directiva.
- h) Nomear delegados para determinadas actividades da asociación.
- i) Interpretar os estatutos e o Regulamento de réxime interno e velar polo seu cumprimento.
- j) Calquera outra facultade que non sexa de exclusiva competencia da Asemblea xeral.

Artigo 27. A Presidencia da Xunta Directiva terá as seguintes atribucións:

- a) Presidir e dar por rematadas as sesións que celebre a Xunta Directiva e a Asemblea xeral, dirixir as deliberacións dunha e doutra, e decidir con voto de calidade en caso de empate.
- b) Representar a asociación perante calquera organismo público ou privado.
- c) Ordenar pagamentos e autorizar coa súa sinatura os documentos, actas, certificacións e correspondencia.
- d) Adoptar calquera medida urxente que a boa marcha da asociación aconselle ou no desenvolvemento das súas actividades resulte necesaria ou conveniente, sen prexuízo de dar conta posteriormente á Xunta Directiva.

Artigo 28. A **Presidencia** será asistida nas súas funcións por unha vicepresidencia que, ademais, substituiraa nos casos de vacante, ausencia ou enfermidade.

Artigo 29. A **secretaría** recibirá e tramitará as solicitudes de ingreso, levará o ficheiro e o libro de rexistro de persoas asociadas e terá ó seu cargo a dirección dos traballos administrativos da entidade. Correspóndelle, así mesmo, notificar as convocatorias, custodiar as actas e expedir certificacións destas co visto e prace da presidencia. Deberá tamén presentar as contas anuais e o cumprir as obrigas documentais nos termos que legalmente se establezan.

Artigo 30. A **tesourería** exerce a dirección dos traballos de xestión económica da asociación, a custodia e mantemento dos libros de contabilidade e os inventarios, así como tódolos documentos económicos necesarios para a elaboración das contas e balances.

Deberá preparar os orzamentos, as contas anuais e os balances perante a Xunta Directiva e a Asemblea Xeral así como dar cumprimento ás ordes de pagamento que expida a presidencia.

Artigo 31. As vogalías no número que determine a Asemblea Xeral terán as seguintes atribucións:

- a) Realizar programas e propostas na súa área de actuación.
- b) Desempeñar os traballos que lle sexan encomendados pola Xunta Directiva.

CAPÍTULO IV RÉXIME ECONÓMICO

Artigo 32. A asociación como entidade sen ánimo de lucro, en ningún caso poderá distribuír os recursos obtidos entre As persoas asociadas, senón que, deberán destinarse, exclusivamente, ó cumprimento dos seus fins.

Artigo 33. O patrimonio inicial da asociación é de cero euros.

Artigo 34. O exercicio asociativo e económico será o ano escolar (do 1 de setembro ó 31 de agosto). Así o seu orzamento será de curso lectivo e deberá ser aprobado pola Asemblea xeral ordinaria do exercicio económico que corresponda e a liquidación do orzamento terase que presentar necesariamente, na Asemblea xeral ordinaria inmediatamente posterior ó remate do exercicio.

Artigo 35. Anualmente e con referencia ó derradeiro día do exercicio económico de cada ano, practicarase o inventario e o balance de situación, que se formalizará nunha memoria que será posta a disposición das persoas asociadas durante un prazo non inferior a 15 días do día sinalado para a Asemblea xeral ordinaria, que deberá aprobalo ou censuralo.

Artigo 36. Os recursos económicos dos que dispón a asociación para o cumprimento dos seus fins son:

- a) As cotas periódicas das persoas asociadas.
- b) As cotas extraordinarias que propoña a Xunta Directiva e que sexan aprobadas pola Asemblea xeral.
- c) As doazóns ou subvencións que poidan conceder os organismos públicos entidades privadas ou particulares.
- d) Calquera outro ingreso admitido pola normativa vixente para actividades non lucrativas.

Artigo 37. A Xunta Directiva poderá realizar apertura de contas correntes e depósitos bancarios delegando esa facultade á Presidencia, Vicepresidencia ou Tesourería.

- Para a disposición de fondos das entidades bancarias onde a asociación os ten depositados, deberá a entidade bancaria ter recoñecidas as sinaturas que correspondan á presidencia, vicepresidencia e tesourería, para o seu emprego conxunto requirindo dúas sinaturas.
- A Xunta directiva poderá autorizar a consulta de movementos das contas a calquera membro da xunta directiva para maior eficiencia nos traballos que teña encomendados.

CAPÍTULO V MODIFICACIÓN DE ESTATUTOS E DISOLUCIÓN DA ASOCIACIÓN

Artigo 38. Os presentes estatutos poderán ser modificados por proposta da Xunta Directiva ou un cuarto das persoas asociadas.

A convocatoria da Asemblea xeral extraordinaria estará acompañada do texto coas modificacións propostas, abríndose un prazo de 10 días para que calquera persoa asociada poida dirixirle á Secretaría as propostas ou emendas que considere oportunas. Estas complementarán a documentación da citada Asemblea e serán entregadas cunha antelación mínima de 3 días a súa realización.

Artigo 39. Para ser aprobada a reforma dos estatutos será necesario o voto favorable de 2/3 dos membros da Asemblea xeral das persoas asociadas.

Artigo 40. A asociación disolverase polas seguintes causas:

- a) Pola vontade das 2/3 partes das persoas asociadas.
- b) Por outras causas determinadas legalmente.
- c) Por sentenza xudicial.

Artigo 41. Acordada a disolución a Asemblea xeral extraordinaria designará tres persoas asociadas liquidadoras, que xunto á presidencia e á tesourería, procederán a efectuar a liquidación dos bens, pagando débedas, cobrando créditos e fixando o haber líquido resultante.

O haber resultante, unha vez efectuada a liquidación, doaráselle a outra entidade de carácter non lucrativo, inscrita no Rexistro de Asociacións da Comunidade Autónoma e que teña os mesmos ou similares fins.

O xustificante da doazón será presentado no Rexistro de Asociacións correspondente para proceder á inscrición da disolución da asociación.

DISPOSICIÓN ADICIONAL

En todo canto non estea previsto nos presentes estatutos aplicarase a vixente Lei 1/2002, do 22 de marzo, reguladora do dereito de asociación, e as disposicións complementarias.